



Newyddion da yr angylion

www.lambsongs.co.nz Gan Jill Kemp (Cyf. Susan Williams) Lluniau: Richard Gunther



Nid oedd lle i Mair a Joseff aros yn y llety ym Methlehem heblaw am y stabl ble roedd yr anifeiliaid yn cael eu cadw. Pan gafodd y baban Iesu ei eni fe wnaethon nhw wely iddo yng nghafn bwydo'r anifeiliaid a elwir yn breseb.




Y noson y ganed Iesu ym Methlehem roedd bugeiliaid allan yn y caeau gerllaw. Roedden nhw'n eistedd yn gwylio eu defaid er mwyn gwneud yn siŵr bod eu praidd yn ddiogel.




Yn sydyn, llanwyd yr awyr â golau llachar a disgleiriodd gogoniant Duw o'u hamgylch. Roedd y bugeiliaid wedi eu brawychu.



Yna ymddangosodd angel a siaradodd gyda nhw. "Peidiwch â bod ofn," meddai. "Pan glywch chi'r newyddion da sydd gen i ar eich cyfer bydd eich calonau'n llenwi â llawenydd."




"Ym Methlehem heddiw mae'r Gwaredwr wedi cael ei eni. Fo ydy Crist yr Arglwydd, anrheg gan Dduw i chi. Pan ddewch chi o hyd i fabi bach wedi ei rwymo mewn cadachau llin, meddal a'i osod yn y gwair yn y preseb, byddwch yn gwybod bod fy neges yn wir."



Yna llanwyd yr awyr dywyll â channoedd o angylion yn canmol ac yn diolch i Dduw gan ddweud, "Gogoniant yn y nefoedd i Dduw a bydded i'r holl fyd gael ei llenwi â Heddwch a Charedigrwydd tuag at bawb."



Brysiodd y bugeiliaid i Fethlehem a daethant o hyd i'r baban Iesu wedi ei lapio yn y cadachau llin, meddal, yn cysgu'n braf yn y gwair ym mhreseb yr anifeiliaid, yn union fel y dywedodd yr angel. Dywedon nhw wrth Mair a Joseff am newyddion da yr angel!



Wedi iddyn nhw adael y stabl dywedodd y bugeiliaid wrth bawb roedden nhw'n eu cyfarfod am yr angylion a'r newyddion gwych. Roedd y Gwaredwr a'r Meseia a addawyd wedi dod i'r byd o'r diwedd! Adeg y Nadolig rydyn ni'n parhau i gofio anrheg Duw i bob un ohonom.